

- 40 scio. (*PA. intus*) miseram me, differor doloribus!
 Iuno Lucina, fer opem! serva me obsecro! *HE.* hem
 numnam illa quaeso parturit? *GE.* certe, Hegio. *HE.* em
 illaec fidem nunc vostram inplorat, Demea:
 quod vos vis cogit id voluntate impetret. 490
- 45 haec primum ut fiant deos quaeso ut vobis decet.
 sin aliter animu' voster est, ego, Demea,
 summa vi defendam hanc atque illum mortuom.
 cognatu' mihi erat: una a pueris parvolis
 sumus educ[a]ti; una semper militiae et domi 495
- 50 fuimus; paupertatem una pertulimus gravem.
 quapropter nitar faciam experiar, denique
 animam relinquam potiu' quam illas deseram.
 quid mihi respondes? *DE.* fratrem conveniam, Hegio;
 is quod mi de hac re dederit consilium id sequar. 499^a
- 55 *HE.* sed, Demea, hoc tu facito cum animo cogites: 500
 quam vos facillime agiti', quam estis maxume
 potentes dites fortunati nobiles,
 tam maxume vos aequo animo aequa noscere
 oportet, si vos volti' perhiberi probos.
- 60 *DE.* redito: fient quae fieri aequomst omnia. 505
HE. decet te facere. Geta, duc me intro ad Sostratam.—
DE. non me indicente haec fiunt: utinam hic sit modo
 defunctum! verum nimia illaec licentia
 profecto evadit in aliquod magnum malum.
- 65 ibo ac requiram fratrem ut in eum haec evomam. 510